

BERITA ONLINE
ASTRO AWANI
TARIKH : 26 FEBRUARI 2022 (SABTU)



Malaysia, Thailand setuju bangun vaksin, kaji pembinaan HSR Bangkok - Kuala Lumpur

Fareez Azman

Februari 26, 2022 14:47 MYT



Menurut Perdana Menteri, Datuk Seri Ismail Sabri Yaakob berkata, kerjasama yang bakal dirintis itu akan melibatkan kerja-kerja R&D vaksin antara pakar-pakar dari kedua-dua negara. - Gambar BERNAMA

BANGKOK: Kerajaan bersetuju untuk bekerjasama dengan Thailand dalam membangunkan vaksin, kata Datuk Seri Ismail Sabri Yaakob.

Menurut Perdana Menteri, kerjasama yang bakal dirintis itu akan melibatkan kerja-kerja penyelidikan dan pembangunan (R&D) vaksin antara pakar-pakar dari kedua-dua negara.

Beliau berkata, pembangunan vaksin yang dirancang itu akan melibatkan kerjasama antara Malaysia Genome Institute di bawah Kementerian Sains, Teknologi dan Inovasi (MOSTI) yang sedang membangunkan vaksin tempatan dengan sebuah universiti Thailand yang turut membangunkan vaksin negara itu.

"Oleh itu kita berdua bersetuju bagi meneroka peluang untuk menjalinkan kerjasama bagi membangunkan vaksin ini melalui kajian dan penyelidikan," kata Perdana

Menteri dalam sidang media di sini, pada akhir lawatan rasminya ke Thailand pada Sabtu.

Bina dua jambatan

Ismail Sabri berkata, selain rancangan membangunkan vaksin, beliau turut menyentuh beberapa perkara lain ketika mengadakan pertemuan dengan rakan sejawatannya, Prayuth Chan-ocha dalam lawatan itu.

Kedua-dua pemimpin itu juga tidak ketinggalan turut membincangkan mengenai pembinaan dua buah jambatan baharu yang menghubungkan Kelantan dan Thailand.

"Pembinaan dua jambatan ialah jambatan Sungai Rantau Panjang ke Sungai Golok, Kelantan dan satu lagi jambatan menghubungkan Pengkalan Kubor - Tak Bai. Kita bersetuju pembinaannya diteruskan dan disegerakan," jelasnya lagi.

Malaysia dan Thailand juga, kata Ismail Sabri, amat memahami keperluan meningkatkan pembangunan infrastruktur di sempadan dan kerana itu ada beberapa cadangan dipersetujui untuk dilaksanakan segera.

"Seperti kita tahu perdagangan sempadan amat penting, oleh itu kesalinghubungan amat mustahak.

"Oleh itu beberapa peningkatan membangunkan infrastruktur di sempadan yang dipersetujui perlu disegerakan. Pertama jajaran jalan menghubungkan Kompleks ICQS Bukit Kayu Hitam dan CIQ Sadao.

"Perkara ini masih di dalam perundingan kita bersetuju supaya kumpulan kerja pakar serta jawatankuasa kerja teknikal untuk menyegerakan rundingan jajaran tersebut," kata beliau.

HSR Kuala Lumpur - Bangkok

Dalam pada itu, Malaysia jelas Ismail Sabri, turut bersetuju untuk mengadakan kajian kebolehlaksanaan mengenai Kereta Api Berkelajuan Tinggi (HSR) dari Kuala Lumpur ke Bangkok.

Bagi tujuan itu, kementerian dan agensi berkaitan, ujar beliau, akan diminta untuk memulakan kajian dalam kadar segera.

"Kita juga berbincang mengenai keperluan masa hadapan dalam membina keretapi laju high speed rail dari Kuala Lumpur ke Bangkok.

"Kami berdua bersetuju supaya kedua-dua negara mengadakan kajian kebolehsaknaan dan kita akan minta kementerian dan jabatan berkaitan mengambil tindakan segera," jelas Perdana Menteri lagi.